

**Uunga siunnersuut: Inissianik attartortitsisarneq pillugu Inatsisartut peqqussutaata allannguuteqartinneqarnissaa pillugu Inatsisartut peqqussutaat nr. x, xx 2008-meersoq**

(Piffissaq eqqorlugu akiliiffissatut piffissaliussap sivitsorneqarnissaa aamma akilinngitsuukkanik akiitsoqalernerminni annaasanullu nalimmassaasoqarnerani akilersuisinnaanermut periarfissiineq il.il.)

**§ 1**

Inissianik attartortitsisarneq pillugu Inatsisartut peqqussutaanni nr. 2-mi, 12. maj 2005-imeersumi imaattunik allannguisoqarpoq:

**1. § 74** imatut oqaasertalerneqassaaq:

"§ 74. Pisortaniit attartortitsisup akiliinngitsoortoqartillugu attartornermik isumaqatigiissut atorunnaarsissaavaa, tak. § 73, imm. 1, tamanna pillugu piumasaaqatip allakkatigut attartortumut takkunnerata kingorna attartortup kingusinnerpaamik ulluinnaat arfinillit qaangiunneranni akiligassanut kinguaattoorutini akilersimangippagit, imaluunniit imm. 5 naapertorlugu piffissaliussaq naatinnagu attartortoq akilersuinissamik isumaqatigiissuteqarsimangippat. Tamannattaq akilersukkanut akiliutissat akiliinngitsoorneranni atuutissaaq. Attartortitsisup akileeqqusissutaa ullup piffissaq eqqorlugu akiliiffissap kingulliup kinguninngua tunniunneqassaaq, tassanilu paatsuugassaannngitsumik allassimassaaq, attartornermut akiliutissanut kinguaattoorutit piffissaliussap naannginnerani akilerneqangippata attartortitsineq atorunnaarsinneqassasoq.

*Imm. 2.* Allakkatigut akileeqqusissutip attartortumut takkunnerata kingorna kingusinnerpaamik ulluinnaat pingasut qaangiunnerini akiitsuni akilinngitsuukkani iluarsiiffigisimangippagit, attartortitsisup namminersortup § 73, imm. 1 naapertorlugu kingusinaartumik akiliinerup kingunerisaanik attartornermut isumaqatigiissut atorunnaarsissinnaavaa. Attartortitsisup akileeqqusissutaa ullup piffissaq eqqorlugu akiliiffissap kingulliup kingunitsianngua tunniunneqassaaq, tassanilu paatsuugassaannngitsumik allassimassaaq, attartornermut akiliutissanut kinguaattoorutit piffissaliussap naannginnerani akilerneqangippata attartortitsineq atorunnaarsinneqassasoq.

*Imm. 3.* Pisortat attartortitsisut akileeqqusissutip suliarineqarneranut akitsuutitut annerpaamik 150 koruuninik akileeqqusisinnaapput.

*Imm. 4.* Pisortanit attartortitsisup attartornermut isumaqatigiissut atorunnaarsissimappagu, attartortitsisoq atorunnaarsitsineramik atortussaajunnaarsitsinerminut annerpaamik 150 koruuninik akileeqqusisinnaavoq.

*Imm. 5.* Attartortoq ineqarnermut, imermut kiassarnermulluunniit akilinngitsuukkaminik akiitsoqartoq akilersuinissamut nammineq piumasutsiminik pisortanut attartortitsisunut isumaqatigiissuteqarsinnaatitaavoq, taannalu qaammatit

sisamat sinnerlugit sivissuseqartinneqarsinnanngilaq. Akilersuinissamut isumaqatigiissuteqarnissamut piumasaqaatit makkua naammassineqarsimassapput:

1) Attartortup pisortat attartortitsisut akilersuinissamik isumaqatigiissuteqarnissamik qinnuigissavai, allakkatigut akileeqqussisutip attartortumut apuutereernerata kingorna kingusinnerpaamik ulluinnaat arfinillit qaangiutsinnagit.

2) Attartortoq akilersuinissap isumaqatigiissutigineqarneranut akitsuummik 250 koruuninik akiliuteqassaaq aammalu qaammatit akilersuiffiusut ingerlaneranni qaammatit tamaasa 50 koruunimik akiliuteqartassalluni.

3) Akilinngitsuukkat attartortup qaammatini 1-iniit 4-inut akilersussavai.

*Imm. 6.* Akilersuinissamik isumaqatigiissusiorsinnaatitaaneq attartortunut, ukiut pingasut kingullit ingerlanerini attartugarisimasaminni ineqarnermut aningaasartuutitut ingerlaavartunut akilersugassanulluunniit akiliinngitsoortarnermikkut sumiginnaasimasunut atuutissanngilaq. Taamatuttaaq akilersuinissamik isumaqatigiissusiorsinnaatitaaneq attartortunut akilersukkanik ingerlatsereersunut atuutissanngilaq.

*Imm. 7.* Pisortat attartortitsisut najugaqatigiiffinni pigisaminni tamani attartortitsinermi annaasanut akilersukkanullu annaasanut ataatsimut nalimmassaanissamik, naatsorsuutitut tunngasumik naatsorsuutini immikkoortuni kontomik ataatsimoorussamik ammaalluni pilersitsissapput, kontomullu tassunga najugaqarfiit ataasiakkaat ukiumut annaasassaattut missingersuusiarteqartut, inigisap annertussusaani kvadratmeterimut ukiumut 25 koruuninit ikinnerusinnaanngitsut illuartinneqartassapput. Annaasaqaatit konto naatsorsuutitut tunngasoq, ukiumoortumik naatsorsuusiorteqartartussa, aqqutigalugu akilerneqartassapput".

## § 2

Inatsisartut peqqussutaat 1. januar 2009-mi atuutilerpoq,

*Namminersornerullutik Oqartussat, ulloq xx 2008*

Hans Enoksen

/

Kim Kielsen